

四庫全書

子部

欽定四庫全書

歷算全書卷三十五

宣城梅文鼎撰

交會管見

求初虧復員定交角

以初虧復員定時分依法求其距午時分午後以加午  
前以減各加減日實度所對時分

八九十度  
表取之

為初虧復

員時定總時

以定總時各求其日距限限距地高遂以得其交角加減之得初虧復員時定交角

求初虧復員時先闕後盈之點在日體上下左右法自天頂作垂弧過日心以至地平分日體員周左右各一百八十度次依定交角度分日在限西初虧為右下之角復員為左上之角其度右旋日在限東初虧為右上之角復員為左下之角其度左轉並自垂弧左右起算數至定交角度分即得太陽員周初虧時先闕復

員時後盈之點其定交角或為鈍角者上下相易

如本為右

下者變為右上本為右  
上者變為右下左亦然

是為虧復時交道中徑食十

分者用此即中西舊法所謂八分以上初虧正西復員

正東者也

初虧復員各依其  
定交角度分取之

若食九分以下當先求蝕緯差角法為并徑與月視黃

緯若半徑與蝕緯差角之正弦也以月視黃緯化秒乘

半徑為實以并徑減一分化秒為法除之得蝕緯差角

之正弦查正弦得度分以加減虧復時交道中徑得日

體周邊先缺後盈之點

視緯北者日在限西初虧以加復員以減日在限東初虧以減復員以加視緯南者日在限西初虧以減復員以加日在限東初虧以加復員以減並置交道中徑以蝕緯差角度分加減之得數仍自垂弧左右起算得初虧何處先缺復員何處後盈上下左右皆可預定

求食甚在日體上下左右

惟食十分者食甚時兩心相掩或全黑或作全環皆無

上下左右可論其食九分以下皆以陰陽厯論南北視緯若食甚時正在黃平象限則視緯北者食甚在日體上半缺口正向天頂形如仰瓦即舊法所謂正北視緯南者食甚在日體下半餘光厚處正對天頂缺處正向地平兩角下垂形如覆梳即舊法所謂正南也若此者只有上下可言而無左右偏側之度其餘日在限西則南緯在左下北緯在右下日在限東南緯在右下北緯在左下並以食甚時定交角之餘度或左或右並從天

頂垂弧之兩旁起算即得食甚在日體上下左右之度  
求日體周邊受蝕幾何

法用太陽太陰兩半徑相并為和相減為較和較相乘  
為實月視黃緯為法除之得數以加減月視黃緯訖乃  
折半以乘半徑又為實以太陽半徑為法除之得餘弦

查表得度倍之即食甚時日體受蝕度分

以太陽全周  
分三百六十

度內該受蝕  
者幾何度

加減例

日半徑大于月以得數加黃緯日  
半徑小于月置黃緯以得數減之

求日食三限在地平上高度

食甚時日距地高即可徑用 初虧復員各以定時求

其距午分依日赤緯南北度入高弧表即各得虧復時

地平上高度

如無正表取前後二表數以中比例之  
假如其地極出地三十一度則查三十度

表及三十二度

表以兩表數并

又算法

以限距地高度與日距限之餘

而半之即是本地高弧之數

度相加為摠相減為較摠較各取餘弦視摠弧過象限  
則兩餘弦相并不過象限兩餘弦相減並折半得高弧

正弦檢表

得高度

求日食三限地平經度

法以地平緯度之餘度分與極出地之餘度分相加為



總相減為較總弧較弧之餘弦相減若總弧過象限則

相加並折半為法

初數

又取較弧矢與日距北極度之矢

對弧矢也日赤緯在南者以加象限赤緯在北者置象限以赤緯減之即各得距北極度

較乘半徑為實實如法而一得角之矢

以矢命度

若日食在

午前其角度為距正北子正之度食在午後以減半周

為距正南午正之度

正矢與大矢並同一法

三限皆如是

求帶食分在日體上下左右

以日出入時距緯為法半徑乘月視黃緯為實實如法

而一得正弦查表得帶食緯差角度分如求初虧復員之法以帶食緯差角加減白道中徑得帶食分在日體上下左右若帶食在初虧後食甚前其加減用初虧法帶食在食甚後復員前其加減用復員法

帶食在初虧後食甚前者 陰歷日在限西加 日在限東減

陽歷日在限西減 日在限東加

帶食在食甚後復員前者 陰歷日在限西減 日在限東加

陽歷日在限西加 日在限東減

右並置月道中徑以帶食緯差角度分加減之得數仍  
自垂弧左右起算即得帶食時食分最深之處在日體  
上下左右

凡帶食出入時或微虧或見蝕半或半以上其餘光皆成兩角外向均折兩角取其中即

帶食分最深之處

求帶食出入時日邊受蝕幾何

以太陽太陰兩半徑相併為和相減為較和較相乘為  
實日出入時距緯為法除之得數以加減日出入時距  
緯

日半徑大于月以得數加入距緯日半徑小于月置距緯以得數減之

乃折半用乘半

徑又為實太陽半徑為法除之得餘弦查表得度倍之  
為帶食出入時太陽周邊受蝕之分

以三百六十度分  
太陽全周內該缺

幾何  
度分



作日食分圖法

交食之驗非圖莫顯圖必分作其象始真故不憚反覆詳明以著其理

一定日食時交道斜正

作立綫以象垂弧此綫上指天頂下指地平即地平經度圈之一象限也綫上取一點為心規作員形以象太陽其員周為地平經綫所分左右各一百八十度依本限定交角作點

或初虧或復員或食甚各有定交角

若日距限在西其度

右旋日距限在東其度左旋於太陽員周上下並從垂

線分處數至定交角度止得兩點聯為一直綫必過太

陽之心兩端稍引長之橫出是為日食時月道交於垂  
弧之象若日距限西交道左昂右低日距限東反之其  
初虧食甚復員三限距限東西有時而異雖其不異亦  
必有遠近高下之殊則交道低昂異勢未可以一法齊  
也今三限各求定交角依度作圖不論東西南北一以  
太陽邊左右上下言其虧甚之狀即測算可以相符歷  
法之疎密可以衆睹更無絲毫可容假借

如圖甲乙為垂弧 甲丁乙丙為日體 乙己丙為定

交角丁己甲為對角乙至丙甲至丁皆定交角之度因  
日距限在限西故右旋數其度 丙丁為上下兩點

己為日心聯丙丁為直綫則過日心稍引長之至庚則


成交道因在限西故月道左昂右低

交道即月道也為月視緯所成在食

十分時可名月道其食不滿  
十分者可名月道平行綫




# 定交角圖一



各號並與前同

惟日距限在限東故從乙至丙從甲至丁並左旋數定  
交角度而庚辛月道右昂左低

# 定交角圖二



如圖月道平過與天頂垂弧相交成十字正角而又在

午方則上北下南左東右西各如本位矣

如舊法食十分初虧正西

復圓正東食八分以下者陰歷初虧西北食甚正北復圓東北陽歷初虧西南食甚正南復圓東南惟此時為然此必日食在黃平象限左右因定交角加減而成正


角然不常有即有之又未必在正南方則與東西南北之名不相叶應故不如用定交角直以上下左右言其

方向


黃平象限有離午正二十三度時又有定交角加減則雖離午正三十餘度之遠而能有此象蓋

即月道之九十度限也食既者遇之虧必正右復必正左北緯者虧右上復左上而食甚正向天頂南緯者虧

# 定交角圖三




# 定交角圖四



右下復左下而  
食甚向北平

# 定交角圖五





己為日戊為月

乙至丙甲至丁皆交角之度

丙為初虧丁為復圓

戊丙己丁為月道

此因日食十分故即用丙丁二點為初虧復圓即舊法  
所云初虧正西復圓正東者也然以日距限西故初虧  
在日體右下復圓在日體左上

此亦日食十分因距限在東故初虧在日體為右上復圓在日體為左下

凡日距限西者復圓交角必小於初虧日距限東者復圓交角必大於初虧故必分作其圖始能合算今從簡省以交角相同者合為一圖非謂一食中虧復同角也



一圖初虧

先以初虧定交角如法作垂弧及交道安太陽於交點  
若食十分者於太陽右方截取交道如月半徑之度以  
此為心規作月體與太陽邊相切即初虧時先缺之點

圖已  
見前

若食不滿十分者用緯差角度算太陽邊周之度月視  
黃緯在北向上數之在南向下數之並從太陽右方交  
道起算數至緯差角度止即為初虧時先缺之點自太

陽心向此點作直線透出其外稍引長之以并徑為度  
從心截取引長線作點即初虧時兩心之距也以截點  
為心太陰半徑為度作圓形即初虧時太陰來掩太陽  
相切之象也從太陰心作直綫與交道平行則月視行  
之道也從太陽心作垂綫至視行綫成十字角即月視  
黃緯也 以上並不論初虧是午前午後亦不論地平  
方位或在正南或偏東西並同一法食甚復圓倣此


乙己丙交角乙丙其度從丙過己心至丁而引長之即月道平行綫

丙己庚為緯差角丙庚其度因月視黃緯在北故從交道丙向上數其度至庚庚即初虧時先缺之點


從太陽心己作直綫過庚點而透出其外為己庚戊綫乃併日月兩半徑得己為度截己庚戊綫于戊戊即太

陰心也以戊庚月半徑從戊心作圓為太陰與太陽邊相切于庚初虧象也

# 初虧圖一



初虧圖二





從月心戊作戊辛癸綫與丙己丁平行月視行道也

此月

視行綫乃人所見月心所行故以丙己丁交綫為月道平行綫從太陽己心作十字垂

線至月視行綫上如己辛月視黃緯也

以上二宗為日距限西日距限西者初虧定交角並為  
右下之角然惟食十分時則初虧右下與定交角同點  
其餘則北緯者能易右下為右上前條是也南緯者能  
易右下為左下此條是也

乙己丙交角以乙丙為度從丙過己心作月道平行綫  
丙己庚緯差角以丙庚為度因月視黃緯在南故從交  
道丙向下數其度至庚庚即初虧時先缺之點

此為緯  
差角大

于定交角故  
易右為左

從己心向庚作己庚戌線而以己戌并徑度截之於戊  
用為月心規作月體與太陽相切於庚象初虧也

從戊心作癸戌辛綫與丙己丁平行月視行道也

從己心作己辛線與戊辛相遇成方角月視黃緯也


甲己丁交角以丁甲為度從丁過己心作丁己丙月道  
平行綫

丁己庚緯差角以丁庚為度因月視黃緯在北從交道  
丁向上數至庚以庚為初虧之點

此亦緯差角大于定  
交角故易右為左

如前從己心向庚作透出綫截之于戊使己戊同并徑  
則戊為月心從戊心作圓形象初虧時太陰以其邊切太  
陽于庚從戊作戊辛癸線為月視行之道與丁己丙平行  
又從己作己辛綫為月視黃緯辛為正角

# 初虧圖三



諸號同前

惟以月視黃緯

即己辛

在南故緯差角

丁己庚角

從交道

丁

向


下數其度

至庚

為初虧之點

以上二者為日距限東凡初虧在限東者其定交角為  
右上之角然惟日食十分與定交角同點而初虧右上  
其餘北緯者能易右上為左上南緯者能易右上為右  
下此二條可以推矣

# 初虧圖四



一圖食甚

先以食甚定交角作垂弧月道於交點安太陽並如初虧法次於太陽周邊數定交角餘度若日距限西其度左旋日距限東其度右旋並於日體上下方從垂綫數起至定交角餘度止各作點聯為一直線稍引長之此線與月道為正十字能過月道之極即月道之經圈食甚時太陽太陰並在此線之上乃以月視黃緯求其距若視緯在北向上量之視緯在南向下量之並從太陽



心截取視緯於月道經綫作點即食甚時兩心之距也  
以此為心月半徑為度規作月體即見食甚時月掩太  
陽在日體上下左右幾何度分此時兩心之距為最近  
其食分最深於此線上分太陽光體為十平分即所食  
之分可見若于太陽之邊數其所蝕光界即知太陽周  
邊受蝕幾何度分

若於月心作線與月道經綫為十字正角即自虧至復  
月行之道也兩端稍引長之用并徑為度從太陽心截

之左右各得一點即初虧復圓之點也

右為初虧  
左為復圓如此

即為總圖

總圖惟食甚為正形初虧復圓亦得大槩仍當于分圖攷之

若食十分者或全黑或作金環並無視緯更無上下左右可論不用此法

又若食甚時定交角滿九十度則北緯正對天頂餘光有如仰盂南緯正對地平餘光有如覆碗其月道左右平衡其南北視緯即於垂弧取距

北緯自太陽心向上  
南緯自太陽心向下

並以月視黃緯取  
其度為兩心之距


不須另作月道經綫又於月道經綫

以月視黃緯量其距若陰厯向上量之陽厯向下量之  
並自太陽心量至視黃緯止從此作線與月道經綫為  
十字角即與虧復月行之道平行南北差之理亦自可  
見

乙己丙為定交角其度自乙右旋至丙丙己丁綫過太陽心為月道平行綫

乙己庚為定交角之餘角其度自乙左旋至庚庚為食甚所向之方從庚過太陽心作午己庚線為太陽全徑分為十分 依月視黃緯自太陽心己截至戊以戊為心月半徑壬戌為度作圓以象食甚時掩日之月計所掩徑自庚至壬得蝕六分餘光自壬至午得四分計所掩邊自酉過庚至卯得缺光之邊一百三十分餘

# 食甚圖一





光自酉過午至卯得未掩之邊二百三十分約為蝕三之一而強

此以太陽邊周為三百六十分也分亦可名度

從月心戌作戊癸線與太陽徑為十字角與交線平行是為月視行之道以并徑為度自太陽心己截戊癸月道于辛于子各為心作太陰象即見初虧于酉復圓於卯可當總圖

交角大者餘角小交角小者餘角大而大致不改即二  
圖可槩其餘

其初虧交角必大于食甚復員交角必小于食甚全圖  
聊舉大意仍以分圖為定



此與前圖皆食在限西故乙己丙定交角同勢惟月視黃緯在北故用甲庚餘角從甲左旋數至庚為食甚所向之方亦作午己庚十分全徑而透出之用月視黃緯截之于戊戌為心戊壬半徑作月體交加于太陽光體之上計所掩自庚至壬得蝕四分有奇其自未過庚至丑為所蝕之邊又如法從戊心作月視行之道以并徑截之于辛于子各作月體即見卯酉為虧復之點凡食在限西者南緯必食甚左下北緯必食甚右上惟

乙巳丙定交角其度自乙左旋至丙丙巳丁過太陽心  
為月道平行綫

乙巳庚餘角度自乙右旋至庚庚巳午太陽全徑引長  
之以月視黃緯度截之于戊戊為食甚時月心所到其  
邊掩太陽至壬午壬為食甚所向之方分太陽全徑為  
十分午壬為所掩之分得二分有奇未午丑為所缺之  
邊約得九之二




此與前圖皆食在限東乙己丙交角同勢惟月視黃緯在南故用甲己午餘角

即乙己庚


右旋從乙至庚庚點為食

甚所向庚己午太陽全徑十分以月視黃緯截己戌戌為月心作太陰體掩太陽至壬得八分有奇未庚丑為所缺之邊約得九之四凡食甚在限東者北緯必左上南緯必右下雖角有大小其大致不變以上二圖可槩其餘 以上食甚四圖或居太陽體之左上左下右上右下並以定交角論其餘角不論地平經度之東西南

# 食基圖四




# 食甚圖五



北並同一理即令食甚正午而距限有東西即交道有  
低昂必無正北正南如舊法所云者也

食甚圖六





此月視緯在北

日食七分奇

甲為食甚在日體上方餘光如仰盂

此月視緯在南

日食五分

戌為食甚

在日體下方

餘光如覆碗

惟此二圖是交角成象限若又居正南方則北緯食甚  
可稱正北南緯食甚可稱正南



一圖復圓

以復圓定交角作垂弧月道安太陽並如上法

若食十分者于太陽左方截取月道如月半徑之度以此為心規作月體與太陽邊相切即復圓時後盈之點

圖亦  
見前

若食不滿十分者用緯差角度算太陽邊周之度北緯向上數之南向數之並從太陽左方交道起數至緯差角度止即為復圓時後盈之點自太陽心向此點作

直線透出其外稍引長之以并徑為度從心截取引長  
線作點即復圓時兩心之距以截點為心規作太陰與  
太陽相切即復圓時太陰行過太陽初離之象也

甲己丁交角


即乙己丙

其度甲丁從丁過己心作丙己丁綫

引長之即月道平行綫

丁己庚為緯差角其度丁庚因月視黃緯在南從交道  
丁向下數其度至庚庚即復圓時後盈之點 從太陽  
心己出直線過庚而透出其外為己庚戊線以并徑為  
度截之于戊以戊為心月半徑為界作太陰圓體切太  
陽邊于庚即太陰行過太陽初離之象也 從月心戊  
作戊辛直綫月視行之道也而已辛者月視黃緯也

# 復圖一




甲巳丁交角即巳其度甲丁從丁作月道平行線過己巳丙心至丙而引長之


丁巳庚緯差角大于交角而月視黃緯在北法當從交道丁向上數丁庚之度跨甲而至庚庚即復圓時復光最後之點又法從己心作丙己丁之十字垂綫乃以月視黃緯為度截之于辛則己辛即食甚兩心之距也從辛又作十字長垂綫與丙己丁交道平行如戊辛癸即月視行之道也次以并徑為度截月視行道于戊以



# 復圓圖二



復圓圖三



戊為心月半徑為度作復圓時太陰象即其邊切太陽  
于庚

以上二圖皆復圓距限西也凡復圓限西者其定交角  
為左上之角然惟食十分其點不改其餘則有易為正  
左稍下如前圖者有易為右上如此圖者餘可數推

從心作太陰體即切太陽于庚而正居太陽左方

乙丙交角以乙丙為度從丙作月道平行線過己心  
至丁而引長之

因月視黃緯在北從交道丙向上數緯差角丙己庚之  
度至庚即庚為復圓之點 又法以丁午丙半周度折

半于午從午作線至太陽心己為丙己丁之十字垂線

于此垂線上截取辛己如月視黃緯即于辛點作十字

交線與交道綫

即月道  
平行綫

平行為月視行之道于此月視

行道取戊己斜距如并徑則戊點即復圓時太陰之心

此交角與差角同度也庚己丙交角其度自庚數至丙

點為月道平行綫所過

丙己丁過心綫為交  
道即月道平行綫

丙己庚差角自丙數至庚

因南緯  
向下數

庚點為復圓時太陰

初離太陽邊猶相切之處也差角丙庚之度與交角庚

丙等故相減至盡而正居太陽之底也


如用又法從

己心作己午垂綫以月視緯截辛點從辛作十字綫如

辛癸與交綫平行為月視行道即可以戊己并徑截戊

點為太陰心其邊即切太陽于庚亦同

# 復圓圖四







凡復圓限東者定交角必居左下然惟食十分者則然  
其餘則有變為日體正左或日體正下者如以上二條  
者可類推也

甲為九十度限 乙為黃道過午規交角 乙丙為黃  
道在午規距天頂之度今用乙甲丙正弧三角形有甲  
正角 乙交角 乙丙弧而求甲丙弧為九十度距天  
頂之度 法為半徑與丙乙弧正弦若乙角之正弦與  
丙甲正弦也

一 半徑

二 丙乙正弦

三 乙角正弦

四 丙甲正弦

增沿歷書乃以丙乙餘弦與乙角餘弦相乘為實半徑

黃道九十度算法之理

與張簡庵問畬

天頂


過黃

極之

線必

為直

角



歷書有求九十度限距天頂及距子午規法今正厥圖

赤道在平地上半周一百八十度而交子午圈處為其

折半最中之處故天頂線交赤道成十字角也天頂線

與赤道作正角惟此一處蓋惟此處能使地平經線即天

頂出線至地平與赤道經線即北極出線至赤道分時刻之線合而為

一從地平經線言之為子午他處則不能也黃道亦然

其在地平上亦一百八十度每度並從黃極出經線至

黃道上成正角但不能過天頂而必有一度為黃道半


周折半之處則此一經線必過天頂而穿黃極天頂線

除之得丙甲正弦失其旨矣

簡菴曰甲角非正角也何以言之自天頂出線過赤道則為正角其過黃道不能成正角甲角既為天頂線過黃道所作之角則必非正角勿菴曰不然甲點者九十度限也若甲非正角則不得為九十度限矣

簡菴曰赤道能為正角者以天頂線能過北極也若黃極則不能過天頂天頂線既不串黃極則甲必不能為正角明矣勿菴曰子午線所以能穿天頂與北極者以

求九十度距天頂又法



既穿黃極則其交黃道處必成十字正角矣天頂線與黃道作正角亦惟此一處

亦如赤道之有子午規

蓋亦惟此處能

使地平經線與黃道經圈合而為一而他度不能西法用九十度限其理如此故甲角必正角簡菴聞此欣然首肯焉

法乃捷矣

又按此以正弧形為本形改用斜弧為次形亦弧三角  
中一法往所未及也可見學問相長之無窮

既得甲丙邊又原有乙丙邊甲正角可求甲乙邊為九  
十度距午規



本法用乙甲丙形求丙甲為九十度距天頂 今依簡  
菴說用丁戊丙形求得戊丙為天頂距黃極之度以減  
象限即得丙甲距天頂之度

法曰以正午黃經之赤道同升度取丁角

從冬至數  
之即得

以

各地北極出地餘度取丁丙邊 以兩極相距二十三  
度半為丁戊邊

是為一角兩邊可求戊丙邊

若用垂弧法雖多轉折其理無訛 若用加減代乘除

丁北極 戊黃極 丑寅圈徑五度為白道極所行之

跡 丑為今所求月道心 即白道極所到 得丑寅邊為丑戌寅

角之度亦即為丁戌丑角度 先用丁戌丑弧三角形

有丁戌邊 為兩極距二十三度半 有丑戌邊 為月道大距五度 有戌角 即上

所論 可求丑丁邊為白道極距北極之弧 可求丑丁


戌角

次用丁丑丙弧三角形 有丑丁弧 為先所求 有丙丁丑角

以先有之戌丁丙角與今得之 有丁丙邊 即本地北極出地餘度

丑丁戌角相加減得丙丁丑角

# 新立算白道九十度限高法



戊角此算之根也

可求丑丙邊為白道極距天頂之弧亦即為白道九十度距地平之高度 求白道極所在

即丑點

法曰凡白

道極隨交點而移交點逆行故白道極亦逆行也先求

正交

或中交

在黃道度分離此一象限即為半交最遠之

所此點與白道極相應若係半交是陽厯則白極在黃極南半交是陰厯則白極在黃極北極距黃極五度奇即丑戌也丑戌弧五度循黃極而左旋有時而合於兩極距線為寅戌或戌辛則無丑戌丁角自此以外皆有

設白道極

丑

在寅即丑戌寅角法當以戌寅五度

白極距黃

極與丁戌二十三度半相減餘十八度半為寅丁寅丁

丙弧三角形有寅丁邊


為白極距北極

有丁丙邊

北極距天頂

有丁

角可求寅丙邊為白極距天頂




又設丑點在辛即以戊辛加戊丁為一邊辛如丁如上法可求辛丙弧為白極距天頂

以上二者因白極距黃極之線與黃極距北極同一大圈之經度故丁戊線有加減而丁角無加減故只用一弧三角形即可得之此惟月邊半交在二至度然後能如是

設正交在秋分之度中交在春分之度則陽歷半交在冬至黃道外陰歷半交在夏至黃道內各五度奇而白道







極在兩極距線外亦五度奇如辛如酉

法當以白黃大距五度奇

辛戌或酉戌

加兩極距二十三

度半

丁戌

共得二十八度半奇

辛丁或酉丁

為一邊 丁丙

為一邊

北極距天頂

丁為一角

或辛丁丙或酉丁丙

可求辛丙邊

或酉丙邊

即白道極距天頂度以減九十度餘為白道距

天頂度

捷法即以所得白道極距天頂命為白道九十度距地平


此圖丁辛線已用弧線不能作兩白道極圈

如圖丙為天頂丁為北極丁戊二十三度半即以丁為  
心戊為界運規作圓即黃極繞北極之圈再以丁戊引  
長之至於辛又以戊為心辛為界作圓為白極繞黃極  
之跡戊辛為黃白距五度奇

此圖則戊  
酉可省

今聯丁辛丙成三角形如上論餘觀圖自明

更當明者白道限度之不能與黃平象限同在一度即  
若黃平象限之不能與赤道高度同在一度同也黃平  
象限與赤道高度能在一經度者惟極至圈在子午規



白極距天頂即命為白道九十度距地平之高圖如  
後

之度為然白道限度之能與黃平象限同在一經度者  
惟兩交在二分之度又極至圈同在午規時也

又設正交在春分之度中交在秋分之度則陽厯半交  
在夏至黃道外陰厯半交在冬至黃道內各五度奇而  
白道極在兩極距線內亦五度奇如寅如未

法當以白黃大距五度奇

寅戌或  
未戌

去減兩極距二十

三度半

戌丁

得餘十八度半弱

寅丁或  
未丁

為一邊

丁丙

為一邊

丁為一角

或寅丁丙  
或未丁丙

可求寅丙邊

或未  
丙邊

為

以上二者並只用一弧三角形何則以交點在二分也  
交點在二分則半交與白極並在極至交圈故丁戌弧  
自有加減而丁角無加減若交點離二分則否何則交  
點逆行即羅計度也交點周於天而半交大距亦一周  
天而白極亦周於黃極左右之小圈故丁角有加減而  
必用兩三角形也

求戌角


用兩三角形  
必先取戌角

法曰正交在秋分則白極在辛

即在酉

從辛左旋過丑至寅而復於辛以生戌角戌角之





度或銳或鈍皆以交點距分之度命之

白極小圈以羅計一周而復於元度

假如正交自秋分向夏至逆行過秋

分二十度則白極離辛點亦二十度以減半周餘百六十度為戊鈍角

求丁角

戊丁丙角

法曰視極至交圈距午圈若干度分即

得戊丁丙角

以加時午正黃道度取之

白道九十度限用法

依前所論以求加時白道九十度限在地平上之高的

確不易

用斜弧三角形

但如此則交食表所算九十度限俱

可不用當另算白道九十度表

法曰丑戌丁三角形以丁戌邊

兩極距二十度半

丑戌邊

白極距黃

極五度戊角

白極距冬至經圈之度亦即正交離秋分之餘度

為二邊一角可求

丁丑邊

此邊之度天下所同

丁角

此角亦天下所同

其法並以戊角之大

小立算

只算半周可以立表矣

正交在

秋分前以過夏至而至春分前以過冬至而至秋分

之度角在極至圈

東西

戊丁丙三角形 求丁角

法曰以應時法求加時午正黃道

可借用黃道九十度表

取其赤

道同升度即得丁角

視同升度在冬至後半周其距冬至度即為丁角

其角

在子午線西

若同升度在夏至後半周即以距夏至度去

減半周餘為丁角

其角在子午線東

此丁角亦天下所同

丑丁丙三角形 先求丁角

法曰以先有之兩丁角相減或相併即得丁角

兩丁角俱在西或俱在東

則相併

兩丁角一在西一在

東

則相減

此丁角亦天下所同

次求丁丙邊

法曰丁丙者各地之北極距天頂也以北極高度減象限得之

次求白道九十度限之高

法曰既有丁角

即上所求

丁丑邊

即先所求

丁丙邊

即極距天頂

為一

角兩邊可求丑丙邊

為白極距天頂度

以減象限得白道九十

度限距天頂亦即得其距地平之高

既得白道九十度限距地平之高再求得月在白道上

距九十度限之度分

法以月距交前交後度減象餘即得

可求其交角

白道

交天頂經度之角也

此交角可借黃道交角表用之 但須補作黃道北


五度表既得交角則高下差可知而東西南北差悉

定矣



月食圖訂誤

欽天監月食圖





康熙四十三年五月十七日乙卯望月食分秒時刻并起復方位

京師月食十分三秒

初虧子正二刻三分 東北

食既丑初三刻八分

食甚丑正一刻二分

生光丑正二刻一分

復圓寅正初刻一分 正北稍偏西

右計食限內凡十三刻十三分

按食限內共十三刻十三分折半得六刻十四分故以

此減食甚時刻得初虧

自初虧子正二刻三分至食甚丑正一刻二分正得六刻十四

分加食甚亦得復圓

自食甚丑正一刻二分至復圓寅正初刻一分亦得六刻十四分

是虧至甚甚至復時刻適均也時刻所以適均者月行

天之度均也然則作圖之法自當以食甚月體置於虧

復兩限適中之處而不宜偏側矣今監頒蝕圖乃偏置

於東若是則虧至甚月行之度分多甚至復月行之度

少度既不均則時刻亦宜增減若時刻既無增減則圖之偏者必非正法矣

又按食既至食甚食甚至生光時刻亦宜適均與虧至

甚甚至復之理無二

歷書本法虧復折半之數謂之食甚距分以減食甚得初虧若以加

食甚得復圓其食既至生光折半數謂之食既距分以減食甚得食既以加食甚亦得生光並無長短伸縮

今圖中所注食既至食甚時刻多

食既是丑初三刻八分至食甚丑正一刻

二分計一食甚至生光時刻少

食甚丑正一刻至生光丑正二刻一分只十四

分相差十分何也豈以食甚圖偏而自疑其法耶不然

何以若是

又按交食表食甚距分是一時四十四分

即監推六食刻十四分

既距分是四十二分

實計二刻十二分

月食只十分○三秒食

既生光不得有五刻九分之久

倍食既距分得八十分實五刻○九分

覺其非是而棄表不用也然表之數宜改而其法不宜

改

表自既至生光五刻九分監推只二刻○八分是改數也歷書以距分加減食甚得既與生光而監推相

差三分刻之今改其數并改其法不知何所見而云然

二是改法也

也

或疑月行有遲疾自生光至食甚行遲故歷時刻多食甚至生光行疾故歷時刻少此亦說之可通者也然月之遲疾必以漸成決無於二刻八分中頓有十分之差月平行二刻八分以行天三分度之一而弱且食既生光既有遲疾之差初虧復圓何以獨無可謂進退失據矣

又按食甚云者以月於此時侵入闇虛獨深也則其距前後之時刻必為折中均平之處也故月食未既者必於食甚時定其食分以此時所蝕之分最大也

假如月食九分

則惟食甚時能滿九分前是以謂之食甚若圖有偏側

後皆少食八分以下盡然

不得謂之食甚矣

食未既時有食分以攷之

食分最多時始為食甚

食既矣則食甚

無可指惟賴食既生光時刻折半取中而今乃相差若

此又何所據而為食甚耶

又詳檢之初虧至食既

計五刻五分

食既至食甚

計一刻九分

甚至生光

計十四分不滿一刻

生光至復圓

計六刻

無一相同而遲

疾皆不倫初限較末限既先疾而後遲

初虧至食既五刻五分是初限行疾

也生光至復圓整六刻是未限行遲也

二限較三限又先遲而後疾食既至食

甚一刻九分是次限行遲也食甚至生光只十四分而不滿刻是三限又行疾也

是初虧行疾

限至食既而忽遲食既行遲限至食甚而頓疾食甚行疾限至生光以後而又遲不識月轉遲疾有如此行度否乎

歷算全書卷二十五